

2019

AÑA DI FAMIA Y
DI CUIDO DI NOS
MUCHANAN

ISLA(•)NLINE

Diahuebs 28 November 2019

Email: prensa@arubagovernment.aw Tel: 528-4900



GOBIERNO DI ARUBA

UN ISLA UNI

Nov.
2019

Un Isla Uni ta un Isla cu ta Progresá...

ISLA ONLINE

NOTICIA DI GOBIERNO



Prome Minister Evelyn Wever-Croes:

LOGRO GRANDI:

UN lo yuda cu e meneho di genero pa brinda mas proteccion y crea oportunidadnan igual pa e hende homber y hende muhe



Recientemente representantenan di UN Women tawata na Aruba pa asisti den un conferencia hunto cu tur esnan cu ta traha den e area di derechonan di hende muhe tanto den sector publico como den sector priva. Den e conferencia, a delibera riba e puntonan cu mester haya mas atencion pa fortifica e posicion di hende muhe na Aruba. Unda por crea mas oportunidad y logra oportunidadnan igual pa hende homber y hende muhe.

Prome Minister Evelyn Wever-Croes: “Mi ta sumamente orguyoso di a logra esaki, producto di trabounan duro cu nos a bin ta haciendo ya caba pa algun luna hunto cu United Nations na New York”.

Durante su bishita na United Nations na september ultimo, Prome Minister a papia cu e Directora Ehecutivo di Un Women,

sra. Phumzile Mlambo na unda cu a yega na palabracionnan importante pa Aruba. UN Women a aproba pa yuda nos traha un maneho riba e posicion di hende muhe na Aruba. UN Women a comete su mes pa sostene Aruba pa bin cu un maneho integral pa cu e desaroyo di hende muhe/ igualdad di genero.

Prome Minister ta duna di conoce cu esaki ta un dia grandi, un logro grandi. Aruba y UN Women, representa pa sra. Alison McLean a firma e MoU pa e ‘gender policy’ na unda a yega na palabracionnan concreto con UN lo yuda nos riba e meneho di genero pa brinda mas proteccion y crea oportunidadnan igual pa e hende homber y hende muhe. Esaki ta dirigi tambe pa e hende homber mirando cu den cierto areanan, e hende muhe ta haya mas privilegio y oportunidad cu hende homber. Nos kier crea un plataforma igual.

Prome Minister Evelyn Wever-Croes:

FRONTERA CU VENEZUELA TA KEDA CERA!

Den number di Gobierno di Aruba, Prome Minister Evelyn Wever-Croes ta informa cu e frontera entre Aruba y Venezuela ta keda cera por lo pronto. E decision aki ta basa riba e siguiente argumentonan.

Gobierno di Aruba ta sigui e desaroyo na Venezuela hopi di cerca. E situacion ta dificil y miyones di habitante ta purba sali di e pais. Desde 2015, 4.5 miyon Venezolano a bandona nan pais, y pronto e total lo surpasa 5 miyon. E impacto di e crisis di Venezuela den e pais ta inmenso y e impacto riba e paisnan cu ta den cercania di Venezuela ta hopi serio. Entre nan Aruba, cu ta hopi cerca di Venezuela.

Gobierno di Aruba ta purba atende cu e crisis aki lo miho posibel.

Na Aruba tin miles di persona di Venezuela.

Banda di esey, actualmente nos tin como 2 mil peticion pa asilo y ta purba atende cu diligencia teniendo cuenta cu tratadonan internacional di derechonan humano.

E frontera entre Aruba y Venezuela ta cera desde februari di e aña aki despues cu Venezuela unilateralmente a cera e frontera. Na mei Venezuela kier a habri e frontera pero Gobierno di Aruba a dicidi e ora pa cer'e.

Gobierno a prolonga e ciere aki na juni y september y e tabata valido te 10 di december. Gobierno di Aruba awor a dicidi di prolonga e ciere aki cu 3 luna mas.

Gobierno a haya peticion di ciudadanonan cu kier bay bishita famia na Venezuela of cu kier bay dokter na Venezuela. Tambe Gobierno a wordo acerca pa importadonan di fruta pa importa fruta y berdura di Venezuela. Y finalmente Gobierno a wordo acerca pa Hulanda cu tin problema cu e ciere di frontera pasobra nos no ta den guerra cu Venezuela. Gobierno ta compronde tur e motibonan y peticionnan aki y nos a considera nan tur, pero na e momento aki habri e frontera cu Venezuela no ta

den interes general di pais Aruba.

"Nos ta convivi cu e situacion na Venezuela. Nos tin conocir, famia, amistadnan aya y aki cu ta sufri hopi bou e circunstancianan aki. Aruba ta haciendo su parti.

Como hende, como mama, y wela, mi por sigura bo cu e decision aki ta duro, pasobra mare nos por a yuda mas, mare nos por a haci mas, pero nos no por. E problemanan di Venezuela mester wordo

resolve den Venezuela mes. Aruba no por soluciona nan. Nos mester tene cuenta cu Aruba awor.

Mi ta spera di por conta cu comprension di comunidad di Aruba pa cu e decision aki.

Y mientras tanto mi ta pidi pa nos tene e pueblo di Venezuela den oracion y ohala cu pronto e situacion por resolve", Prome Minister Evelyn Wever-Croes a expresa.



**Den number di Gobierno di Aruba,
Prome Minister Evelyn Wever-Croes
ta informa cu e frontera entre
Aruba y Venezuela ta keda cera!**

Gobierno di Aruba ta sigui e desaroyo na Venezuela hopi di cerca. E situacion ta dificil y miyones di habitante ta purba sali di e pais. Desde 2015, 4.5 miyon Venezolano a bandona nan pais, y pronto e total lo surpasa 5 miyon. E impacto di e crisis di Venezuela den e pais ta inmenso y e impacto riba e paisnan cu ta den cercania di Venezuela ta hopi serio. Entre nan Aruba, cu ta hopi cerca di Venezuela.

FRONTERA TA KEDA CERA POR LO PRONTO



MINISTER OTMAR ODUBER

MINISTER di Desaroyo Teritorial, Infraestructura y Medio Ambiente



ULTIMO SIMAN PA HACI ENTREGA DI ZIENSWIJZE RIBA ROPV

E proceso di ROPV ta andando pa cual desde prome di October e concepto di ROPV (cROPV) tabata 'ter inzage' na diferente localidad y online, comunidad por a tuma nota di e plan na oficina di DIP durante un periodo di un luna (te cu prome di November 2019). Manera cu ya a informa comunidad, desde prome di November a inicia cu e proceso di zienswijze cu ta tumando luga te cu prome di December 2019. Comunidad ainda tin e oportunidad pa entrega comentario y pensamentonan por escrito a base di locual cu a mira of constata den e temporada di un luna di inzage riba e concepto di e ROPV.

Considerando cu e fecha aki ta riba un diadomingo, huridicamente comunidad por entrega zienswijze te cu dialuna 2 di december pa 12or di merdia! Ta importante pa comunidad tuma nota di e fecha y menciona pa no keda afo, pesey ta haci peticion na comunidad pa entrega esaki mas liher cu ta posibel.

Kico ROPV ta nifica pa Aruba?

Por medio di e Plan di Desaroyo Teritorial (ROP) 2019 - 2029, tin diferente area (gebied) defini riba e mapa di Aruba, tur cu un color cu ta indica ki tipo di area e ta, sea ta pa vivienda, naturalesa, desaroyo economico etc. Awor cu e ROPV, pa

cada area lo duna na nan un 'bestemming', pues indicacion di kico por wordo haci den cada area y kico no, di tal forma cu Aruba completo ta di acuerdo cu ne.

A base di locual cu ya DIP a presenta di e ROPV den concepto, comunidad tin e oportunidad pa entrega nan punto di bista, remarca of obhecion te cu 2 di december 12or di merdia.

Inicio hoorzitting

Unabes cu e proceso di zienswijze pa ROPV termina ta inicia dibiaha cu e hoorzittingen cu lo tuma lugar riba e siguiente fechanan:

- 3 y 9 di december 2019 di 4or di atardi pa 6or di atardi na DIP.
- 5 y 6 di december di 9or pa 11or di mainta den sala di conferencia grandi di DOW.

Pues tur persona cu a entrega zienswijze lo ricibi e oportunidad pa reuni cu DIP durante di 20 minuut pa trata cualkier preocupacion y intercambia pensamiento. Ta spera di conta cu presencia di tur persona cu a entrega zienswijze, pa di e forma aki forma parti na e proceso di democratisering di e ROPV.



DESPUES DI MAS CU 40 AÑA WARDANDO, AWE GABINETE WEVER-CROES A CUMPLI DEN E BARIO DI HOOIBERG





MINISTER XIOMARA RUIZ-MADURO

MINISTER di Finansa, Asuntonan Economico y Cultura



Minister di Cultura Xiomara Maduro: JUAN CHABAYA “PADU” LAMPE “ARUBA SU TATA DI CULTURA” A BAY SOSEGA



Nos Tata di Cultura Juan Chabaya Padu Lampe a bay sosega lagando un legado bunita atras pa nos. Danki Padu pa tur cos. Den mente y curason Padu lo ta bibo pa semper. Condolencia y hopi forza na famia y na Aruba henter.

Minister di Cultura ta comparti un parti chikito di ken ta Padu:

Juan Chabaya Lampe, miho conoci como ‘Padu del Caribe’ a nace dia 26 di april 1920 na Aruba. El a haya e nomber di cariño ‘Padu’ for di su Padushi y e nomber artistico “Padu del Caribe” el a haya durante un grabacion di disco na Venezuela. Un baluarte di nos cultura cu a desaroya su propio estilo riba tereno musical, como compositor, pintor y escritor. Logrando asina admiracion local y internacional.

Padu a lanta den un famia musical. Su tata Harry Lampe tabata tocado di piano y tabata lesa nota musical. Hunto cu su rumannan, tata di Padu tabata forma un grupo musical den cual nan tabata toca piano, fluit, fio, cuarta y wiri. Na un edad hoben (12 aña) Padu tabata dedica tempo na mandolin, clarinet y cuarta y a desaroya basta agilidad, te cu piano a bira su instrumento preferi. Despues cu el a scucha Rufo Wever toca, Padu a keda inspira pa sigui cu piano. Cu tempo el a desaroya su propio ritmo y estilo. Na un edad hoben di 16 aña Padu a cuminsa toca pa publico y e hoben pianista y compositor tabata considera Rufo Wever su gran inspiracion pa su desaroyo musical.



Como compositor Padu tin mas o menos 200 composicion musical riba su nomber. Hubert Booi tabata skirbi texto pa cancion pa e grupo hubenil 'De Trupialen' y Padu tabata traha melodia pa nan. Pa conserva y promove ritmo y melodia tipico di Aruba, manera wals, danza, mazurka y tumba, Padu y Rufo Wever a cuminsa cu grabacion y produccion di disconan 78 RPM destina pa e mercado di Antia Hulandes. Un di e grabacionnan ta e cancion compone na 1952, graba na 1954, yama 'Aruba Dushi Tera', cu dia 16 di maart 1976 oficialmente a bira nos Himno di Aruba. Padu a toca piano y canto tabata di 'De Trupialen' bao direccion di Frere Alexius.

E cantica preferi di Padu mes ta 'Abo So' un cancion inspira pa amor, cu palabranan bunita y hopi profundo.

E prome LP cu Padu a graba ta 'Round trip with Padú del Caribe', graba na Corsou cu Thomas Henriquez. Pa e exito di su LP 'Padú del Caribe en Venezuela' (graba na aña 1960) el a ricibi e premio 'Piano de Oro'. Despues Padu a graba 11 LP RCA Victor, den añanan 60. El a pone su prome CD titula 'Recuerdonan Stima' riba mercado na 1993. Pa e CD aki Padu a ricibi 'Den Ambiente Award' y tambe na aña 1993 un plakkaat cu un CD y Cassette di Oro di 'Zona Bon Records'. Su ultimo CD 'Padú del Caribe' a aparece riba mercado na 2008.

Desde inicio di e planta di television di Aruba na 1963 y pa tres aña sigui, Padu tabata duna oportunidad na talento local den su programa 'Padú del Caribe y su show.' Padu ta di opinion cu folklore semper ta hopi importante, e ta promove nos identidad y nos cultura, nos mester laga otronan conoce y cuid'e bon. Pa su contribucion valioso riba tereno cultural Padu Lampe a ricibi varios premio y condecoracion. Banda di e premionan pa su contribucion na e mundo di farandula, aki nos ta comparti algun, Padu a haya e condecoracion como 'Ridder in de Orde van Oranje Nassau' (1972) di su Mahestad Reina Juliana, e 'Orden di Andres Bello Segunda Clase' di Gobierno Venezolano (1975) y e 'Zilveren Anjer' cu ta un honor Hulandes halto riba tereno cultural (1986). Tambe el a haya e reconocimiento pa 'distinguished services rendered to the community' di Kiwanis Club of Aruba (1966), 'Paul Harris Fellow' di Rotary Club of Aruba (1991), un homenahe di Dhaddy Brokke den Golden Tulip Hotel (1991) y 'Top 20 awards' di Radio Galactica. Sinembargo e reconocimiento mas grandi pa Padu tabata cu na 2001 el a haya e nombramento oficial como 'Tata di Cultura di Aruba' for di Gobierno di Aruba. E premio 'Mara di Oro' Padu a haya na aña 2004 y na 2007 Bon Dia Aruba a nombra Padu como 'Man of the Year'. Na 2006 Grupo Cultural 'De Trupialen' a dun'e un homenahe y el a haya un luga riba nan 'Muraya di Fama'.

"Aruba Patria aprecia, nos cuna venera, chikito y simpel bo por ta, pero si respeta". Di e manera aki e tononan glorioso di nos Himno Aruba Dushi Tera ta cuminsa. Un cantica for di e mentenan creativo di cual nos inigualabel Padu Lampe ta un di e co-authornan. Awe Padu a bay laga nos fisicamente. Nos Himno cu despues di un lucha hiba pa entre otro nos Libertador Betico Croes a wordo oficialisa 42 aña pasa dia 16 di maart 1976 pa e Gobierno insular y resona pa promer biaha como e Himno di Aruba riba 18 di maart 1976 na Wilhelmina stadion. Esaki ta un parti chikito di e biografia di Juan Chabaya Lampe, Masha Danki Padu pa tur locual bo a haci pa Aruba, Padu sosega na paz.



“TUR MUCHA TIN DERECHO RIBA PROTECCION CONTRA ABUSO Y NEGLIGENCIA” - ARTICULO 19 TRATADO DI MUCHANAN

Awe 29 di november ta un fecha caminda nos ta recorda e di dos aniversario di e tragedia cu a sosode riba nos isla caminda dos mucha inocente a perde nan bida. E dos muchanan a fayece a consecuencia di maltrato severo y negligencia. Esaki ta algo cu nos comunidad di Aruba no por lubida y ta un sucedido cu hamas por ripiti.

Sociaal Crisisplan a wordo estableci basa ariba e crisis social cu ta eherce aki na Aruba y e dos criaturanan aki cu a perde nan bida. Esaki ta e motor di hopi persona y instancia cu ta trahando incansabel pa logra e meta pa alivia e crisis social aki na Aruba. Pa es motibo nos como ciudadano no ta permiti pa lubida kico ta e Derechonan di nos Muchanan, basa ariba e Tratado di nos Muchanan.

Kico ta e Derechonan di Mucha? Abo ta na altura di e derechonan di cada mucha? Akibou por lesa 10 articulo di e 54 articulo di derechonan di mucha cu ta wordo trata internacionalmente;

1. Un mucha ta un persona bou di 18 aña;
2. Tur derecho ta aplicabel pa tur mucha;
3. E interes di mucha mester ta central;
4. E estado/pais mester boga pa e realisacion di tur e derechonan;
5. Mayornan ta guia e yui ora di eherce su derechonan;
6. Cada mucha tin derecho riba bida y desaroyo;
7. Cada mucha tin derecho riba un nomber y nacionalidad;
8. E estado/pais mester proteha e identidad di e mucha;
9. Cada mucha tin e derecho pa lanta y crece cerca su mayornan;
10. Mucha y mayor tin e derecho di ta hunto como famia.

Tur mucha tin nan derecho y ta keda na nos como adultonan responsabel pa dunanan e guia y e sosten, e cariño y proteccion, e motivacion y comprension pa asina nan por crece den un ambiente caminda nan bienestar y siguridad ta central. Nos no mester lubida cu nos muchanan di awe ta nos futuro di mañan y hunto como un comunidad nos por pone como meta pa proteha tur nos muchanan di tur forma di abuso y negligencia pa asina nan por crece y bira adultonan saludabel y emocionalmente stabil.

Ultimo desaroyonan ta indica cu implementacion di e 31 proyectonan bou capa di Sociaal Crisisplan (SCP) gradualmente ta dunando su frutonan importante manera ampliacion di capacidad y expansion di servicionan social di diferente fundacionnan y departamentonan di gobierno. Asina mes, comunidad ainda ta ser confronta cu incidentenan lamentabel cu ta duna señal cu mester sigui traha diligentemente pa yega na cambionan cu ta necesario. Un di proyectonan importante ta esun unda tur e sectornan ta trahando hunto pa yega na un protocol pa implementacion di e ley di codigo di siguridad pa menornan. E codigo di siguridad aki lo haci raportahe di incidentenan y sospecho di abuso di menor obligatorio pa tur profesionalnan. Tambe lo implementa un sistema di registro central cu tur departamento concerni lo atende cu casonan di abuso y negligencia na un forma hopi mas lihe y eficiente.

Abuso di mucha ta algo cu nos no por tolera ni acepta y a bira tempo pa nos no bira wak otro banda, sino enfrenta esaki. Si abo conoce of sa di un caso di abuso di mucha no keda keto, pero kibra e silencio. Yama pa conseho of ayudo si bo ta sospecha abuso of negligencia di menor na 5881010 pa haya mas informacion na Bureau Sostenemi cu ta e meldpunt oficial. Paso tur mucha tin e derecho di proteccion y amor. E bienestar y siguridad di nos muchanan ta e responsabilidad di nos tur.

Pa mas informacion tocante Sociaal Crisis Plan por tuma contacto na 5281100 of por bishita nos Facebook page @sccparuba.





"Cada mucha tin e derecho riba proteccion contra abuso y negligencia"

Articulo 19 Tratado di Muchanan





DEN CUADRO DI INNOVACION LO PUBLICA LEYNAN Y NAN SPPLICACION VIA E-BOOKS Y ARUBA LO TA PROME DEN CARIBE



Manera ta conoci Gabinete Wever-Croes y ministerio di Husticia ta dunando prioridad pa up-date leyman cu ta hopi anticua. Leyman ta e software di un pais y tin leyman cu ta data di siglo anterior cu a bay den Antia y despues Aruba p'esey mester percura pa continuamente tin up-date di e leyman. Den e cuadro ey tin hopi ehercicio andando y pronto por ehempel lo introduci ley cooperativo nobo pa Aruba (Boek 2). Ta un par di decada cu Aruba no conoce un up-date riba su leyman cooperativo y esaki lo bira realidad pronto cu cooperacion di Parlamento.

Tambe ta pendiente e invoeringsverordening pa loke ta trata e codigo civil cu a bay Parlamento na fin di September. Esaki tambe tin un par di aña pendiente unda ta bay introduci por ehempel leyman di herencia. E 'erfrecht' lo wordo modernisa hunto cu otro leyman cu lo actualisa. Tambe ta bay cambia e codigo penal, cu DWZ ta trahando riba dje actualmente y diferente otro leyman via un verzamellandsverordening caminda ta bay up-date diferente ley cu ta riguarda husticia cu ta algo historico pa Minister Bikker. Den e verzamellandsverordening ta bay up-date diferente ley na mesun momento y asina conoce un adelanto riba up-date di e leyman.


Den e cuadro aki normalmente tin e website unda ta publica e leyman, pero tradicionalmente ta cada tanto tempo ta publica bukinan cu nota di splicacion. E buki aki, sector Huridico cu ta

traha tur dia cu ley ta uza e buki diariamente. Ora di print un buki e ta tene fecha di printing y pero anualmente mester up-date e. Minister Bikker a bisa cu el a sinta studia y mira con otro pais ta atende cu esaki y kier bin cu algo innovativo. Den cuadro di innovacion Ministerio di Husticia tin e intencion di bay over na cuminsa publica e texto hunto cu e nota di splicacion Memorie van toelichting di leyman via bukinan electronico (E-Books).

E bentaha di E-books ta;

- por mantene e texto up-dated na cambianan di ley;
- ta inclui e nota di splicacion;
- e ta miho pa nos medio ambiente pasobra no mester print hopi papel.
- si ta desea pa tin un printed version por ordo un hardcover, dus un buki tradicional.

Cu esaki Aruba lo ta un di e lidernan di innovacion riba e tereno aki. For di e sondeo cu a haci, ta un par di legislado na mundo so ta publica nan leyman via E-Books. Por ehempel na Merca e estadonan di Texas, Florida, Winsconson y na Europa por ehempel Alemania ta hopi activo riba esaki. Pa Caribe y den mundo Aruba ta bay ta un di e prome nan cu ta introduci e dimension aki.



Imsan, Ambulance, Bombero, Super Heroes y Polis HUNTO NOS A LAGA NOS MUCHANAN CU UN SMILE RIBA NAN CARA

Recientemente ariba e fecha di 20 november 2019 dia internacional di derecho di mucha tur e unidatnan cu ta sirbi y proteha nos cumindad a tene nan di dos Heroes Day. Riba e fecha aki hunto cu nos heroenan a bishita diferente scol rond di nos isla.

Keda pendiente pa e cobertura amplio riba e dia special aki. Hunto como un famia pero cu diferente petchi nos a pone ambiente y alegria riba cara di tur nos chikitinan!





Minister Dangui Oduber:

SVB NA EAGLE TA BAY HAYA UN RENOBACION Y EXPANSION!

Diaranson atardi Minister di Salubridad Publico Sr. Dangui Oduber a acudi na Banco Social di Aseguradonan (SVb) na Eagle pa anuncia e renobacion y expansion di e oficina. E mandatario a duna un discurso caminda e la enfoca riba e necesidad di e renobacion y expansion di e edificio di SVb na Eagle. "Na momento cu mi a drenta den e gobierno mi tabata na altura di e situacion di escasez den espacio pa traha cu SVb tabata encontra su mes den dje" asina e mandatario a expresa den su discurso. E la pidi director di Sv b pa pone como prioridad pa percura pa Sv b haya un edificio nobo y tambe renoba e edificio existente. Esaki ta hopi importante pa e trahadornan tin un espacio comodo pa por haci nan trabou. E hende pa e gobierno aki ta central y minister Oduber ta contento con Sv b ta wordo maneha y dirigi pa a percura pa nan haya un edificio nobo. E gobierno aki a cumpli cu deseo di e trahadornan.

Minister Oduber a anuncia cu e trabounan di expansion lo inicia na maart 2020 y lo termina pa fin di aña 2020. E inversion di e expansion den su totalidad incluyendo muebleria y ekipo ta calcula di costa entre 6 pa 8 milyon florin y despues ta sigui cu e restructuracion di e edificio existente.

Minister Dangui Oduber a menciona cu e proximo añanan SVb ta bay inova den su structura di trabao, pasando di un organisacion basa riba funcionnan, cu un herarkia fuerte y centralisa, pa un organisacion basa riba rolnan, un herarkia menos fuerte y mas descentralisa. Ta pesey e intencion ta cu e diseño di e muebleria lo ta asina cu eta consistente na e desaroyonan interno pa futuro. E espacio di trabao cu ta bay crea ta bay cuadra cu e transformacion cu SVb ta bay ta traha riba dje den e periodo 2020-2025.

"Mi ta contento di mira cu SVb su ambicion ta pa crea espacio di trabao di calidad, y cu ta den linea cu principionan di organisacionnan moderno y flexibel, empoderando e trahador lo mas tanto posibel, dirigi riba aumenta e calidad di servicio pa e clientenan. Loke ta remarcabel ta cu SVb tin un percentahe di 80% di empleado cu no ta meld AO" esei tabata palabranan di e mandatario. Finalmente Minister Dangui Oduber a gradici y desea tur e empleadonan di SVb exito den nan funcion.





Minister di Turismo,
Salubridad Publico y Deporte



IBISA

Instituto Biba Saludabel y Activo

ta presenta

Hoben Activo Hoben Feliz



GRATIS

ORARIO
3PM - 4:30 PM
EDAD
8 - 10 AÑA

YMCA Dakota

Ping Pong	5 Nov	7 Nov	12 Nov	14 Nov
Basketball	19 Nov	21 Nov	26 Nov	28 Nov
Karate	3 Dec	5 Dec	10 Dec	12 Dec



Pa info contact

IBISA na 582-4987 of 584-8903



IBISA ARUBA

MINISTER PLENIPOTENCIARIO BESARIL A BISHITA REPRESENTANTE DI REINO NA UNION EUROPEO ROBERT DE GROOT



Na ocasion di e "Internacional Solidarity Conference on the Venezuelan Refugee and Migrant Crisis" na Bruselas, Minister Plenipotenciario Guillfred Besaril a bishita e Representante di Reino Hulandes na Union Europeo Robert de Groot. Na e encuentro aki tambe tabata presente Minister Plenipotenciario di Curaçao Anthony Begina y Gezaghheber di Boneiro Edison Reina.

Topico principal tabata e conferencia riba e situacion na Venezuela y e crisis cu esaki a crea pa e paisnan bisiña. Minister Besaril a haci uso di e oportunidad aki pa informa sr. De Groot riba e im-pacto di e crisis aki pa Aruba. E mandatario a cunminsa na bisa cu Aruba y e otro islanan tin lasonan grandi y historico cu Venezuela. Aruba den e periodo di 1989 pa 1994 cu construccion di hotelnan na Aruba, tabata ta principalmente Colombianonan a bin Aruba pa traha den e sector hote-lero. Den e periodo despues entre 1996 pa 2011 a bin un stabilisacion den e cantidad di stranhero cu ta traha na Aruba. 'Nos por a nota cu desde e situacion na Venezuela, hopi mas Venezolano a drenta e mercado laboral. Awor aki 10 prociento di e poblacion di Aruba ta Venezolano. Esaki ta trece cune un presion grandi riba e facilidadnan social y tambe un presion grandi riba nos pre-supuesto. E situacion aki tambe a pone presion riba seguridad. Y como cu turismo ta e pilar mas grandi di economia di Aruba esaki ta un aspecto hopi importante pa atende,' asina Minister Besaril a bisa.

Sr. Besaril a bisa cu e presencia di Aruba na e conferencia ta

sumamente importante pa scucha bon loke ta bin dilanti, pero aun mas importante ta pa mira unda Aruba por haya sosten pa enfrenta e situacion aki. Di su banda sr. De Groot a bisa di tin hopi confiansa den e Comision Europeo nobo, cu lo hiba un maneho pa asuntonan exterior hopi mas fuerte. Tambe sr. De Groot a bisa cu tin miembronan den Parlamento Europeo, manera Samira Rafaela cu ta keda pidi e atencion nesesario pa cu e situacion di Venezuela pa cu Aruba, Curaçao y Boneiro.

Banda di e situacion na Venezuela sr. De Groot a papia cu e delegacion riba e desaroyo pa cu e paisnan LGO (Landen en Gebieden Overzee). Negosacionnan mester conduci na un areglo nobo pa e paisnan LGO. Despues cu Reinado Uni sali for di Union Europeo ta presenta su mes un situ-acion nobo. E cantidad di paisnan LGO lo bira menos, mirando cu hopi paisnan LGO cu ta parti di Reinado Uni ta cai afor. Segun sr. De Groot e budget pa e paisnan LGO lo keda mescos cu ta entre 500 y 690 miyon euro, cu e unico cambio cu esaki ta keda reparti den menos pais.

Robert de Groot a sigi bisa cu desaroyo sostenibel ta un tema hopi importante entre e paisnan LGO. Mescos ta e caso cu cambio di clima y e efecto cu esaki tin riba e nivel di laman. Tambe e problematico di un bon maneho di desperdicio ta riba agenda di e paisnan LGO.

Finalmente sr. De Groot e efatisa cu e paisnan por conta cu e Representacion di Reino Hulandes na Union Europeo pa sosten den nan negosacionnan cu Europa.



FORMACION SOCIAL

TRAYECTO LO CUMINSA
25 februari 2020

INSCRIBI AWO!

Bo oportunidad pa haci un cambio positivo den bida



GOBIERNO DI ARUBA



UNDA MI POR INSCRIBI?

Oficina di Formacion Social
Marinierskazerne Savaneta
Bureau Sociale Vorming
Tel: 522-5352

Sra. Jessica Ras
info.formacionsocial@gmail.com

KI DIA MI POR INSCRIBI?

AWO CABA

FORMACION SOCIAL TA ALGO PA BO?

Bo ta un hoben masculino entre 18 y 24 aña?

Bo no a termina un scol secundario?

Bo kier mehora bo oportunidad pa trabou?

Bo kier un cambio positivo den bo bida?

Bo a termina un scol secundario y ta sin trabou?



Bishita nos na: Formacion Social - SVT

GABINETE WEVER-CROES



GOBIERNO DI *ARUBA*

*un
Feliz Dia*

ISLAONLINE
PA INFORMACION
CORECTO Y BERDAD

Gabinete Wever-Croes